

# Da letzte Tog

Text: Tom Lackner

1. Sie schdeht auf in da Frua  
Schdöht an Teekess'l zua  
Und genießt, wia's so sitzt und sinniert an Moment no die Ruah  
Draußt im Stianghaus
2. Wöe boid geht's scho los  
Und da Wiabe is groß  
Auf'm Gaung-Clo, sex Stock, Hochparterre, Mezzanin, Erdgeschoß
3. Seit fünfadochz'g Joa  
Oda länga sogoa  
Hot's do g'wohnt mit da Mama, mi'n Maunn und seit zwanz'g Joa allaa  
Wöe ois oida Mensch
4. Waaß ma jo ned  
Wia laung's no so geht  
Ob dar Hund, den ma kauft, ned oisboid ohne Frauerl doschdeht
5. Und so geht sie hoit e'm  
Allanich duach's Le'm  
Nua maunchesmoi hätt's hoit gean irgend an Mensch'n zum Re'n
6. Und es Heaz wiad ia schwea  
Und sie winscht si so sea  
Nua an Mensch'n in an Haus volla Leit', es is afoch ned fair
7. Des G'schirr, des Besteck  
Und en Mist ramt's no weg  
Zum Frisea waitat s' geh, der is eh glei do hint'n um's Eck  
Beim Espresso
8. Zum Friedhof muaß' foan  
wöe die Blumerln vadoan  
Des einkauf'm kaunn sa se heit' ausnaumsweis' amoi schpoan  
Und die Puivaln hot's
9. Eh scho daham  
Sie schdeigt aus aus da Tram  
Es Postkast'l ramt's goa ned aus, do is eh nua Reklam.
10. Es is meakwüadich zwoa  
Oba r a wundaboa  
Wos ma's letzte Moi tuat, wiakt so fean und doch irgendwie kloa.
11. Heit gehst' no schpazian  
Muang miass'n's di fian  
Oba des wiad di gottseidaunk nimmamea goa so tangian
12. Sie geht auffe und richt  
Si des Bett, woscht si's G'sich  
Nimmt die Puivaln, daunn legt sa se nieda und lescht no es Licht ...